



Lu curé d' Frôfayis èt l' Pére blanc

Ernest BENOÎT
(wallon de Villance)

Pou prêcher la mission a Frôfayis, lu curé avot fwêêt vnu in Pére blanc. C' astot èn-ome dèdja d' in cèrtin.n-âdje. Il avot ène tote blantche bôbe ki lî pindot jusk' al boutrûle. La tonseûr avot fwêêt place a ène grande « mîse a blanc », mès c' astot ossi èn-ome djoyeûs èt malin come in vî rnôd.

Pou rcîr lu rèvèrand tout blanc moussî, lu curé d' Frôfayis avot sortu tous sès pus bès cassons èt sès bèles ârdjintrîes. Il avot dusbouché kékes boutîyes du s' mèyeû vin.

La mission s' avot bin passé. Lès parwasyins astint contints du prêcheû èt adon, lu Pére blanc èt l' curé ont bin mougné èt bin bu (mèrci ptit Jésus). Cand on-z-è bu in vère, lès lingues su dusloyèt èt il astot dja in moumint ku l' Pére blanc rloukot la sièrvante :

- I m' san.ne ku v's-avez ène mou djon.ne sièrvante, èt co plêjante, avu ça...
- Nu pinsez nin a mô, èle nu dmeûre nin voci, èle nu vint ku pou lès grandes ocâsions, avot ruspondu l' curé.

Mès l' malin Pére nu croyot nin l' djon.ne curé...

La mission oûte, lu Pére blanc astot rintré al Trape. Lu curé avot ronsté lès tèchons, mès n'avot nin rtrouvu sa bèle lousse an-ârdjint. Èt kîre èt kîre pa t't-avô la môjon... Pont d' lousse ! Nu sèrot-i nin l' Pére blanc k' m' l' ôrot chôfé, pari ? Non, ça n' su pout nin... Èt pourtant i n' gn-è k' li k' è vnu al môjon duspôy la mission. Dju va lî scrîre in ptit mo bin djinti po n' nin l' jin.ner èt mu l' mète a dos : « Très chér rèvèrand, duspôy ku v's-èstèz rvony, dju su bin malèrèûs du n' nin rtrouvu ma bèle lousse an-ârdjint. C' è-st-in souvni du m' grand mère èt dj' î tins bêcomp. Jamès dul vîe dju n'vonro sondjer ku v's-onrîz comis l' péché d' vol. Mès duspu la mission, i gn-è k' vous k' è vnu al cûre. Vous sèrez bin djinti du m' ahèsser ».

Lu Pére blanc lî ruspond t't-ossi vite : « Très chér pasteûr, vous djez ku dj' su l' seûl a awèr moussé dins vosse cûre duspoy la mission, nu roviez nin ku vosse bèle pitite sièrvante î è moussé ossi ! Mès jamès dul vîe dju n' vonro la rinde rèsponsâbe dul disparicion d' vosse lousse. Èt jamès dul vîe dju n' vonro sondjer k' vous n' coûtchez nin tout seû. Mès dju pu v' dire ku si vous avîz coutché dins vosse lit, duspu ku dj' su vony, v's-onrîz veû k' vosse lousse s' î trovot » !

Malêjis mots

casson = vaisselle en faïence / **Frôfayis** = lieu-dit situé sur le territoire d'Anloy, où se trouvait un village décimé par la peste / **lousse** = louche